

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE

Broj: 09 0 U 038391 25 Uvp
Sarajevo, 23.10.2025. godine

Vrhovni sud Federacije Bosne i Hercegovine u Sarajevu, u vijeću za upravne sporove sastavljenom od sudija Vuković Josipa, kao predsjednika vijeća, Babić Stanković Aleksandre i Džerahović Emire, kao članova vijeća, te Hodžić Merhunise kao zapisničara, u upravnom sporu tužitelja Š.S. iz S..., protiv akta broj: FZ3/2/2-31-1-34-2/21 MB/OB: 1171179110 od 15.01.2021. godine, tuženog Federalni zavod za penzijsko i invalidsko osiguranje Mostar, u upravnoj stvari ostvarivanja prava na starosnu penziju, odlučujući o zahtjevu za vanredno preispitivanje sudske odluke podnesenom od strane tužitelja protiv presude Kantonalnog suda u Sarajevu, broj: 09 0 U 038931 21 U od 04.12.2024. godine, na nejavnoj sjednici održanoj dana 23.10.2025. godine, donio je

R J E Š E N J E

Postupak u ovom upravnom sporu se prekida.

O b r a z l o ž e n j e

Presudom Kantonalnog suda u Sarajevu, broj: 09 0 U 038391 21 U od 04.12.2024. godine odbijena je tužiteljeva tužba podnesena protiv rješenja tuženog, broj i datum navedeni u uvodu ove presude, kojim je, kao neosnovana, odbijena njegova žalba izjavljena protiv prvostepenog privremenog rješenja Kantonalne administrativne službe tuženog u Sarajevu, matični broj: 1171179110 od 11.12.2020. godine. Tim prvostepenim rješenjem tužitelju je priznato pravo na starosnu penziju počev od 26.08.2020. godine u iznosu od =345,15 KM mjesečno (tačka 1. dispozitiva), koji iznos predstavlja akontaciju penzije (tačka 2. dispozitiva), te riješeno da isplata penzije po ovom rješenju pripada počev od 26.08.2020. godine (tačka 3. dispozitiva), da iznos penzije usklađen na dan donošenja rješenja iznosi =345,15 KM mjesečno (tačka 4. dispozitiva), da će se umjesto ovog iznosa penzije isplaćivati iznos najniže penzije isplaćene za decembar 2016. godine, usklađene za sva pripadajuća povećanja na dan ostvarivanja prava (tačka 5. dispozitiva), da je korisnik penzije obavezan da, u roku od 15 dana, nosiocu osiguranja prijavi svaku činjenicu koja je od uticaja na korištenje odnosno obim prava, u protivnom isplata penzije će biti obustavljena (tačka 6. dispozitiva), te da žalba ne odlaže izvršenje rješenja (tačka 7. dispozitiva).

Protiv pobijane presude prvostepenog suda tužitelj je podnio „zahtjev za ukidanje svih radnji u postupku“ i „opreza radi nepotpun“ zahtjev za vanredno preispitivanje sudske odluke.

Prije rješavanja po podnesenom zahtjevu za vanredno preispitivanje utvrđeno je da je tužitelju rješenjem Općinskog suda u Goraždu, broj: 45 0 V 046467 23 V od 30.10.2024. godine, koje je potvrđeno rješenjem Kantonalnog suda u Goraždu, broj: 45 0 V 046467 24 GŽ 2 od 18.02.2025. godine, djelimično ograničena poslovna sposobnost u dijelu koji se odnosi na samostalno pokretanje postupaka kod institucija pravosudnog, izvršnog i zakonodavnog sistema.

JU Kantonalni centar za socijalni rad Služba socijalne zaštite Općine Novi Grad Sarajevo aktom broj: 31-10/23-550-2859/22 od 15.10.2025. godine obavijestila je ovaj Sud da postupak imenovanja staratelja tužitelju iz ovog upravnog spora još nije okončan.

Imajući u vidu naprijed navedeno ovaj Sud je odlučio kao u dispozitivu rješenja iz slijedećih razloga :

Kako odredbama Zakona o upravnim sporovima („Službene novine F BiH“, broj: 9/05) nije propisan postupak suda u ovakvim slučajevima, to se shodno članu 55. istog Zakona u predmetnom upravnom sporu imaju primijeniti odgovarajuće odredbe kojim je uređen parnični postupak.

Odredbom člana 378. stav 1. tačka 1. Zakona o parničnom postupku („Službene novine FBiH“ broj 53/03, 73/05, 19/06 i 98/15) propisano je, pored ostalog, da se postupak prekida kad stranka umre ili izgubi parničnu sposobnost u toj parnici.

Budući je iz rješenja Općinskog suda u Goraždu, broj: 45 0 V 046467 23 V od 30.10.2024. godine, koje je potvrđeno rješenjem Kantonalnog suda u Goraždu, broj: 45 0 V 046467 24 GŽ 2 od 18.02.2025. godine nedvojbeno utvrđeno da je tužitelju djelimično ograničena poslovna sposobnost u dijelu koji se odnosi na samostalno pokretanje postupaka kod institucija pravosudnog, izvršnog i zakonodavnog sistema, a iz dostavljenog akta JU Kantonalni centar za socijalni rad Služba socijalne zaštite Općine Novi Grad Sarajevo da mu još nije postavljen staratelj, to su u ovom upravnom sporu ostvareni uslovi za prekid postupka, s tim da će se shodno odredbi člana 381. stav 1. i stav 3. Zakona o parničnom postupku postupak nastaviti čim prestanu razlozi prekida.

Zbog svega izloženog valjalo je odlučiti kao u izreci ovog rješenja.

Zapisničar
Hodžić Merhunisa, s.r.

Predsjednik vijeća
Vuković Josip, s.r.